



集古虎符魚符考

集古虎符魚符致


嘉定瞿中溶編輯

男樹鎬校刊



右漢銅虎符背文一行乃樂安王□□□六字之右半腹閒又有樂安右三四字皆篆書金錯以漢建初尺度之字徑二分強其形自頭至尾長三寸強頭至前足下高寸許尾至後足同中脊至腹下高八分許其陰中空上左右有二尖孔下居中一尖孔以受左符之筍攷漢書高祖紀五年十二月甲申始剖符封功臣曹參等爲通侯詔曰齊古之建國也今爲郡縣其復以爲諸侯將軍劉賈數有大功及擇寬惠脩絜者王齊荆地師古曰剖破也與其合符而分授之也

史記高祖本紀六年亦云乃論功與諸列侯剖符行
封徙韓王信太原是封諸侯王有符始於漢初也又
攷後漢和帝永元七年改封章帝子于乘貞王伉之
子夷王寵一名伏胡爲樂安王改平乘郡爲樂安國
詳後漢書章帝八王傳則此當卽寵之符也餘詳後
海鹽亡友張芑堂徵君燕昌以此符撫入金石契不
言所藏之人姓名今不知存否





右漢銅虎符腹閒文二行云與臨袁侯爲虎符第二

篆書十字金錯以漢尺度之字徑三分許其形自頭至尾長三寸四分許頭至前足下高一寸三分腹與後至足下皆高七八分其陰平而左右有二方孔以受筭史漢言高祖剖符封諸侯王而攷史記高祖功臣侯年表臨轄侯戚鯀以起從爲郎以都尉守斬城以中尉侯五百戶十一年二月封子觸龍孫中曾孫賢皆嗣爲侯至元鼎五年坐免袁轄古通則此符乃西京物也漢書功臣表同兩漢無臨轄縣表言鯀以中尉侯五百戶蓋鄉亭之名也此符文皆在腹閒而

非半字又不云左右不獨與前樂安王符不同并與予所見漢符皆異然其陰平而二方孔與錢別駕玷所得南郡守符合蓋西漢之制也漢初封諸侯王所剖之符前人皆未詳其制今据此與前符觀之知亦皆用虎也可以補其闕略又知文字之或半或全制有不同如是此亦芑堂金石契中所模者据形制觀之乃左符也餘詳於後

右漢銅虎符同邑錢獻之別駕坫所藏載十六長樂堂古器款識云長二寸三分頭高九分尾高六分背有銘七字曰與南郡守爲虎符腹有銘四字曰南郡






左二史記文帝本紀二年九月初與郡國守相爲銅虎符卽此是也字皆錯以銀舊說云虎符右留京師左與郡守其合處左有方空右有方柱余謂虎符自古皆有特不以銅作之耳信陵君得魏王虎符奪晉鄙軍在七國時說文解字曰琥發兵瑞玉爲虎文是古用玉符中溶案文帝紀銅虎符下尙有竹使符三字應劭曰銅虎符第一至第五國家當發兵遣使者至郡合符符合乃聽受之竹使符皆以竹箭五枚長五寸鐫刻篆書第一至第五張晏曰符以代古之珪

璋從簡易也小司馬索隱引漢儀銅虎符發兵長六寸竹使符出入徵發小顏云右留京師左與之古今注曰金虎符銀印錯書之張晏曰銅取其同心也又案續漢書百官志符節令一人郎中四人本注曰舊二人在中主璽及虎符竹符之半者漢官曰周禮掌節有虎節龍節皆金也干寶注曰漢之銅虎符則其制也予攷說文解字云符信也漢制以竹長六寸分而相合蓋許君因符字從竹故但主竹使符言之耳然則索隱所引漢儀長六寸當謂竹使符而係於銅



虎符發兵之下誤也而續漢書禮儀志劉昭補注引應劭文亦與前書帝紀同應劭注漢官五卷又撰漢官儀十卷並載隋書經籍志裴駟集解所引應劭語卽索隱所引之漢儀也而云長五寸五乃六之譏且据所見銅虎符以漢尺度之止長二三寸斷無至六寸之理而自應氏以下如崔豹牛寶張晏諸儒皆未詳虎符之制非賴其物流傳何從攷知邪又案漢書景帝紀中元二年始更郡守爲大守百官公卿表同今据予所獲魏郡虎符其文云與魏郡大守爲虎符

證之則稱大守者當是中元二年以後之制而錢君此符止稱守尚在中元二年之前爲西漢初物尤可寶也此符後聞轉歸崑陵孫淵如觀察星衍矣淵翁

久作古人今不知尚藏其家否據錢同人拓本上注云字皆銀錯



右漢銅虎符見顧氏集古印譜云大小依元樣長二寸四分高八分剖而爲二三片相合內左有三筭隆



起右有三孔凹以受筭商銀三行凡十八字按漢文
帝初與郡守爲銅虎符國家當發兵遣使者至郡合
符合乃受之有不合者刻奏呼信嚴矣師古曰與郡
守爲符者各分一半右留京師左以與之漢景帝中
元二年更郡守爲大守上郡卽今之陝西延安府始
置於秦西漢因之東漢郡邑俱廢此符爲西漢物無
疑中溶案錢獻之所藏南郡武亭與予所獲魏郡三
符其背文皆無第幾二字以理度之其腹閒旣著左
幾則背文可不必言矣且据其所撫背文似第一而

左右二腹文並作第二爲不可解攷上郡後漢隸幽
州領十城見郡國志顧氏謂東漢郡邑俱廢誤矣





右漢銅虎符背文一行云與魏郡太守爲虎符八字
乃其左半字也故腹間又有魏郡左三四字皆篆書

集二十一
卷之五
八
以建初尺度之字徑二分許其虎頭至尾徑二寸強
背至腹下與足皆徑九分許其厚二分許其陰中空
而上左右有二筍下居中一筍皆三角凸出道光庚
寅嘉平月與一骨董友以古幣易得其器全無青緣
且銅質盡露蓋出土後人見其文不清因用砂石磨
之損其色澤耳然細玩之通體紅斑隱現真漢物也
非予能辨識古器亦幾交臂失之矣漢代虎符傳世
絕少顧氏集古印譜中模一全者兩面有文較此稍
大文云與上郡太守爲虎符第一乃上郡而非魏郡

又多第一兩字而錢獻之別駕所得一符其文云與
南郡守爲虎符又復不同且止稱守無大字尙是景
帝中元二年以前所頒郡守之符顧氏所模與予所
得此器皆稱大守則中元二年以後制也魏郡之稱
雖不止於兩漢然以南郡上郡兩符證之形制彷彿
其爲漢符無疑漢符皆右留京師左與太守太守所
居或遭兵火易於散失以致湮埋入土久而被發反
得流傳於世故獻之與予所得者皆止左符而如顧
之左右並全者尤不易得也南郡與臨袁二符其陰


皆平實而中作二方孔以受右符之筭上郡符其左
右陰皆空而不平實又作三筭在左符皆與此同可
證二符爲同時物而與中平二年以前之制有異矣
樂安符雖東漢物而爲右符陰作三尖孔亦與此符
及上郡符合又据顧言其字皆商銀而錢君不言予
收符亦無銀錯蓋爲人磨去或入土歲久蝕脫耳古
今注言金虎符銀印錯書之金虎符卽銅虎符也古
有五金銅爲赤金乃五金之一古人稱黃金始爲今
人所云金銀之金



右王莽銅虎符亦錢獻之所藏十六長樂堂款識云長五寸高五分頭至足深一寸四分尾一寸滿身鎏金背有新與武亭汨汨連率爲虎符十一字半文腹有武亭□□四字並陰識蓋新莽時所造也漢書莽傳及地理志所載莽改郡國無武亭之稱未識是何地但製造精工非後人所及故附存之中溶案此符形制大而其陰有六小三尖釘爲合符皆與前異

右漢銅虎符乃南海第一翁閣學言吳氏印統載之
未見詳後予攷漢書地理志南海郡秦置秦敗尉佗
王此地武帝元鼎六年開屬交州

翁樂據印統摹補



右漢銅虎符亦翁氏金石記言續考古圖載濟陰太
守銅虎符肚肋云濟陰右二未詳見後攷地理志濟
陰郡故梁景帝中六年別爲濟陰國宣帝甘露二年
更名

右漢銅虎符翁覃溪閣學兩漢金石記摹其文跋云
以建初尺度之長三寸四分前高一寸二分後高一
寸闊五分蓋其半亦五分也虎形背文云與五原太
守爲虎符第一肚肋上云五原左一皆篆書陷銀爲

之符剖爲二片其左內有三筭隆起右有三孔凹以受之今止見其左也五原秦爲九原武帝更名東漢同之顧氏印數吳氏印統所載銅虎符二一曰上郡第二一曰南海第一南海者差小其陽陰筭竅與此悉同當是一時所造印數印統所謂長短分寸者乃是以今尺量之其實與此符無二也第字從艸印統所摹亦然次弟之弟從韋束形而毛詩正義引說文云第次也字從竹弟豈古本異歟原字中下直畫斷作二筆案說文鱗篆作原從宀宀水原也象水流出

成川形而篆文作字中畫或作𠂇猶之隸楷作𠂇等
字亦皆中斷耳此則無乖於六書之義者也




右漢廣陽左二虎符庚子歲劉燕庭得於長安以拓
本寄示云背文已泐爲火所損予攷漢書地理志云
廣陽國高帝燕國昭帝元鳳元年爲廣陽郡宣帝本
始元年更爲國續書郡國志云廣陽郡世祖有并上
谷永平八年復然則西漢之廣陽本爲國亦嘗改爲
郡此符形制較大於前諸太守符而與樂安王符頗
相似樂安王符背文相合之虎止有樂安王三字此
符文既不存或亦是王國之符未可知因無明證仍

附太守符後

右魏銅虎符亦翁氏金石記模其文云以建初尺度
之長三寸頭身共高二寸身高一寸虎形背文云□
□與驃男爲銅虎符第五肚肋上云驃男右五皆篆

書陷銀爲之與續考古圖所載濟陰太守銅虎符肚
肋云濟陰右二者其制正同濟陰是漢銅虎符也此
符騎男第五騎屬魯國本邾國莽曰騎亭前後漢志
皆屬豫州然漢爵惟王侯二等不及子男至魏晉始
有五等之爵而晉則伯子男以下不置軍此當是魏
物也魏咸熙初始建五等之封其見於史者如傅元
封鶡觚男是也則此騎男右五之符其魏時器歟中
溶案今所見歷代銅虎符背文皆止云與則此與騎
男上不當更有漫滅二字又漢符虎符上皆無銅字

蓋亦魏晉始有之歟



右隋銅虎符背文一行乃右禦衛銅虎符四七字之右半以今工部尺度之徑二分許腹閒橫列相原府

三字徑二分強皆篆書其陰平而頸項閒直鐫右禦
衛三字當腹閒橫列相原四三字皆正書徑三分強
其文但云四而無左右字其虎自頭至尾徑一寸八
分頭至前足下高一寸五分後背至後足下高一寸
二分腹閒寬五分而頭項高出於背六分陰之項後
有十字花一孔以受其半之筍合以爲驗形制與漢
符皆不同此爲嘉興張叔未所藏予以史攷之當是
隋時物隋書百官志言煬帝卽位多所改革改領軍
爲左右屯衛加置左右禦等爲十二衛凡十六府又

云十二衛各置大將軍一人將軍二人總府事其軍士左右禦衛所領名射聲新唐書兵志亦言隋制十二衛有左右禦衛皆有將軍以分統諸府之兵則此爲隋之虎符無疑又攷新唐書兵志言府兵之制起自西魏後周而備於隋唐興因之又地理志於諸州下多載府名而華州注云有府二十其一曰相原蓋唐時尙仍隋之舊制而有此府也唐六典主符注云漢文帝時與郡守爲竹使符第一至第五以代周之鎮主納兵爲銅獸符第一至第五以代周之牙璋各

分半右留京師左以與之皆符合爲信六國時魏公子無忌竊兵符矯命殺晉鄙則六國亦有之後漢太守都尉初除與璽書及發兵亦與璽書或與詔書奏僞創造無由檢知至順帝以此制煩擾但召符節令發銅獸竹使符耳歷魏晉宋梁陳皆用之後魏有傳符歷北齊隋皆用之武德初爲銀菟符後改爲魚符又有傳符主符掌之中溶案其言銅獸符者乃避諱改虎爲獸也然虎符已起於漢初而非始於順帝又但云歷魏晉梁陳而不及隋又言後魏北齊隋皆有

傳符而不詳其制而攷魚符之制實起於隋見北史
隋文帝紀六典又但言唐改魚符而不云承隋之制
可證其言多疏漏今據此符是隋亦有銅虎符之證
又據北史言京官五品以上佩銅魚符則隋制制
符之證也蓋銅魚符乃佩符亦卽傳符而唐魚符文
所謂傳佩者是也其起軍旅則仍用銅虎符耳故北
史並不言改虎符爲魚符攷唐高祖避其祖諱虎如
官名虎賁改武賁地名虎邱改武邱虎林改武林虎
疁則改爲滸疁石刻唐吳達墓志改白虎爲白武而

太和三年嵩高靈勝詩注引白武通卽白虎通也。又晉胡威字伯虎見三國魏志胡質傳注晉隋唐書竝作伯武。又唐月令虎始交作武始交又給諸州傳符之名改西方白虎爲驕虞予又見唐碑改虎皮爲大蟲皮。宋趙德麟侯鯖錄言陸長源以勳德爲宣武軍司馬韓愈爲巡官同在使幕或戲年輩相違周愿曰大蟲老鼠俱是十二相屬何違之有旬日布於長安而後漢書章懷注孔僖語畫龍不成反類狗又改虎爲龍而後周書引韋法保語不入獸穴不得獸子又

唐元和六年周府君碑亦改虎爲獸及唐六典與隋
唐二史所言銅獸符則又皆改虎爲獸而晉書職官
志作銅武符也愚謂武德初改虎符爲菟符者菟卽
兔字之隸變於十二獸方位寅爲虎而卯爲兔因避
虎乃改用其次之獸以兔易虎耳而史家及前代紀
載之書多闕略舛謬惟賴金石之物留傳後世始得
追尋其遺制而補正之故可寶莫如金石也

右隋銅魚符面爲魚形背平上爲陽款一同字體在
隸楷之間下陰款正書武衛和川府第一七字以今
工部尺度之魚長一寸六分寬處有五分大興翁宜



泉比部所藏以拓本見贈也攷銅虎符始於漢至隋
而又有魚符北史隋文紀開皇九年閏四月丁亥頒
木魚符於總管刺史雌一雄三十年十月甲子頒木
魚符於京官五品以上十五年五月丁亥制京官五
品以上佩銅魚符則初用木後乃改用銅而佩之也
唐六典言後魏有傳符歷北齊隋皆用之虎符歷晉
宋梁陳皆用之武德初爲銀菟符後改爲魚符又言
符寶郎凡百大事則出納符節辨其左右之異藏其
左而班其右以合中外之契焉一曰銅魚符所以起

軍旅易守長注云兩京留守若諸州諸軍折衝府諸處提兵鎮守之所及宮總監曾給銅魚符又言魚符之制左三右一王畿之外左五右一注云左者在內右者在外行用之日從第一爲首後事須用以次發之周而復始又攷玉海開元八年二月十二日都尉刺史品卑者假緋魚袋五品以上檢校試判官皆佩魚新唐書地理志於諸州下每載諸府如前相原府之類蓋卽諸州軍之折衝府也六典言諸府折衝都尉各一人注云上府正四品上中府從四品上下府

正五品下案井田之法而備軍政至秦廢井田置郡
縣尉爲太守之二而主兵至漢改四都尉九武職多
以尉爲補後漢省都尉至隋左右衛左右武衛左右
武候各領軍坊鄉團以統戎卒開皇初又置驃騎將
軍府每府有驃騎將軍車騎將軍大業二年改置鷹
揚府每府改驃騎爲鷹揚郎將車騎爲鷹揚副郎將
五年又以鷹揚副郎將爲鷹擊郎將皇朝武德初因
隋鷹揚府依開皇舊名置然攷唐地理志並無和川
府惟雅州注云有和川始陽靈關安國四鎮兵則卽

六典所謂諸處提兵鎮守之所非折衝府也似不當
云和川府又六典言左右武衛大將軍各一人注云
隋採諸武之名置左右武衛府有大將軍一人將軍
一人皇朝因舊光宅元年改爲左右鷹揚衛神龍元
年復故則武衛當有左右之分而此符但云武衛亦
不合惟攷隋書百官志分左右衛左右武衛其言左
右衛又各統親衛置開府注云左勳衛開府左翊一
開府二開府三開府四開府及武衛武候領軍東宮
領兵開府准此又言又有儀同府注云武衛武候領

軍東宮領兵儀同皆准此又言諸府皆領軍坊其所謂武衛者似不分左右也而攷地理志上黨郡沁原注云開皇十六年置沁州又義甯縣十八年改爲和川大業初州廢又廢和川縣入焉明統志和川廢縣東九十里本後魏義甯在平陽府岳陽縣縣隋改曰和川後廢然則此文云武衛府當是隋之開府而和川乃上黨之縣名非雅州之鎮名也且攷隋志言左右衛左右武衛等大將軍正三品上開府儀同等從三品開府儀同等從四品皆與開皇十五年制五品以上佩銅魚符之制合也文又有第一

二字則與六典左三右一左五右一之語亦皆合蓋唐亦承隋之制耳然此當爲隋官之佩符而非發兵符發兵符則仍用虎符也已詳前此與所見唐魚符之文皆異故定爲隋物




新搜蜀州第四



右唐銅魚符錢獻之藏載十六長樂堂款識云長二寸一分寬五分厚二分穿眼背上有同字陽識下有新換蜀州弟四六字陰識鎏金唐書車服志唐高祖銀兔符其後改爲銅魚符以起軍旅易守長宋吳仁傑兩漢刊誤補遺曰銅虎符始于漢文帝至唐易爲銅魚大事則兼勅書謂都督御史改替追換及軍發後更添兵事之類至周顯德六年詔以特降制書何假符契遂廢之又曰武德銅魚符用隋京官之制據之則此云新換蜀州者乃蜀州刺史所用其爲唐器

無疑中溶攷唐六典言魚符之制左三右一王畿之外左五右一又言符寶郎藏其左而班其右則此文云第四當是其左之第四而藏於符寶郎者然又不云左與漢之虎符右留京師左與郡守文有左右字之制者皆異隋書地理志汶山郡後周置汶川開皇初改曰蜀州尋爲會州置總管府大業初府廢則隋文帝時亦有蜀州矣而云第四正與王畿之外左五右一之制合



右唐銅魚符亦獻之所藏十六長樂堂款識云長二寸三分寬五分文曰勝州傳佩勝州唐榆林郡也以唐書車服志攷之則是傳信符也以給郵驛通制命所用中溶攷唐六典言後魏有傳符歷北齊隋皆用

之又言唐傳符之制太子監國曰雙龍之符左右各
十京都留守曰麟符左二十其右一十有九東方曰
青龍之符西方曰騶虞之符南方曰朱雀之符北方
曰元武之符左四右三注云兩京留守及諸州若行
軍所並給傳符皆不言用魚符又言隨身魚符所以
明貴賤應徵召注云親王侯二品以上散官京官文
武職事五品以上都督刺史大都督府長史司馬諸
都護副都護並給隨身魚符隨身魚符之制左三右
一太子以玉親王以金庶官以銅佩以爲飾刻姓名

者去官而納焉不刻者傳而佩之注云隨身魚符皆題云某位姓名其官只有一員者不須著姓名卽官名其曹司同者雖一員亦著姓名隨身者仍著姓名然則此符文曰勝州傳佩當是隨身魚符之傳符矣其上不刻姓名亦正與傳佩之例合而云勝州者蓋勝州刺史所傳佩也惟隨身魚符之制左二右一此不分左右字面者蓋與前蜀州例同又所見魚符其上同字多陽款下文多陰款而此獨相反或時有更易或傳佩者其制皆然則不可知矣据隋書地理志

榆林郡開皇三十年置勝州則勝州亦隋之舊名故
唐志云武德中沒梁師都師都平復置



右唐銅魚符形制略同前而微小款皆陰文爲異攷
唐書地理志朗州武陵郡隸山南道據隋志云武陵

郡梁置武州後改曰沅州平陳爲朗州則唐之朗州亦沿隋之舊名也此符當亦是刺史所佩之傳符也丁酉三月劉吉甫自汀州入都過蘇與予會於都亭橋館舍以拓本分貽匆匆未及詢其所在越三年庚子三月其鄉人月汀李公璋煜自蘇州守升任金陵巡鹽觀察將受代矣予於初六日自疁城買舟復至蘇小住期會至二十四日握手後始悉此符乃其所藏也



右唐銅魚符以今工部尺度之長一寸五分強腹寬處五分強己亥除夕接劉燕庭觀察秦中書言擢甘肅平涼道未抵任而丁太夫人憂回至陝西省城暫住因購得此符拓以寄予也予攷唐書車服志云初

高祖罷隋竹使符班銀菟符其後改爲銅魚符以起
軍旅易守長京都留守折衝府捉兵鎮守之所及左
右金吾官苑總監牧監皆給之畿內則左三右一畿
外則左五右一左者進內右者在外用始第一周而
復始宮殿門城門給交魚符巡魚符然則此符文云
嘉德門內巡其爲城門之巡魚符無疑矣又唐六典
言左右武衛大將軍各一人將軍各二人掌凡翊府
翊衛外府熊渠番上則分配之正殿前則以諸隊次
立於驍衛下在嘉德門內外以挾門隊坐於東西廊

又長安志敘唐皇城西門云承天門之內曰嘉德門
嘉德門東有恭禮門又云東宮門南有嘉德門嘉德
東有奉化門嘉德西有西奉化門則知嘉德門乃其
內城之門也而攷後漢書曹褒傳有章和元年正月
召褒詣嘉德門令小黃門持班固所上叔孫通漢儀
十二篇之語可知嘉德門尙沿漢時舊名矣唐魚符
之制已詳於前此亦不刻姓名之隨身魚符也惟前
皆頒之外州者此則京城所用乃畿內之符未知亦
是左三右一否且魚腹下側別有合符二半字亦與

外州不同恐左右止有二符一留於內一給其官否
則或是在外之右符也此符大小略同前蜀州勝州
二符惟形制小異不及二符之精細其同字及款皆
陰文則與朗州之符同而以嘉字移於同字上又字
體皆不及各符之工整爲異燕庭書中并云惜有一
始平左二虎符昨冬爲葉東卿購去未得一見耳附
志於此以待訪焉

右銅魚符亦見十六長樂堂款識云長二寸三分寬九分厚二分有眼不穿背上有同字陽識不鑄金此隋器也中溶疑此符乃鑄以備用未經頒給者符與印同自當有文著明然後有別隋制雖無明文其理



當然也因無地名等可據故改附唐後



右唐銅龜符以工部尺度之其身長寸許中寬六分
強又上出鼻鋸如龜頭長三分強中寬不及二分亦

己亥除夕得劉燕庭書中以拓本見貽者云近得於洛陽且引張鷺耳目記僞周武姓也元武龜也以銅爲龜符又釋其款文四行云雲麾將軍行左鷹揚衛翊府中郎將員外置阿伏師受纈大利發又末行四字上有第一二字側又有合同二半字并謂武周龜符真絕無僅有之奇寶也予攷張鷺朝野僉載二十

唐書藝文志

卷載二十

云唐爲銅魚符武后以元武爲姓瑞乃爲龜符焉又唐書車服志言高宗給五品以上隨身魚銀袋以防召命之詐出內必合之三品以上金飾袋垂

拱中都督始賜天授二年改佩魚皆爲龜其後三品以上龜袋飾以金四品以銀五品以銅中宗初罷龜袋復給以魚又攷唐六典及唐書百官志雲麾將軍乃武官二十九階之從三品又隋開皇初置驃騎將軍府大業二年改置鷹揚府唐武德初因開皇舊名置是鷹揚之名始於隋惟稱府不稱衛耳又凡左右衛親衛勳衛翊衛及左右率府親勳翊衛及諸衛之翊衛統謂之三衛左右衛大將軍各一人將軍各二人掌統領宮庭警衛之法令又有左右親勳翊衛中

郎將府中郎將掌領其府校尉旅帥親衛勳衛翊衛之屬以宿衛其左右驍衛武衛威衛領軍衛皆有大將軍各一人正三品將軍各二人從三品翊府中郎將各一人正四品光宅元年改左右武衛爲左右鷹揚衛神龍元年復故而攷武后本紀有左鷹揚衛將軍劉虔通右鷹揚衛大將軍李多祚左鷹揚衛將軍曹仁師及右鷹揚衛大將軍黑齒常之突厥車鼻傳右作左又諸夷蕃將傳有右鷹揚衛將軍趙懷節亦在武后時而此文右上加行字者唐六典言凡任官階卑而擬

高則曰守階高而擬卑則曰行此以正四品之翊府
中郎將而階則從三品之雲麾將軍故云行也其官
之下又云員外置者百官志序言內外官定制爲七
百三十員有員外置其後又有特置同正員而文又
云阿伏師受者攷後魏書官氏志云阿伏氏改爲阿
氏則阿伏乃虜姓而師受當是其人之名下又云纈
大利發者攷唐書突厥傳言其別部典兵者凡二十一
八等皆世其官而無員其一曰俟利發又一曰韻利
發又有韻利傳又西突厥傳言統葉護可汗徙廷石

國北之干泉遂霸西域諸國悉以頡利發而攷長安志載游師雄所刻趙楷記奉元縣高宗乾陵諸蕃來助葬之石人背鐫各酋長銜名等文其末有云大首領可汗頡利發又有云大首領吐屯額利發而唐書諸夷蕃將契苾何力傳云九歲而孤號大俟利發一俟利發上加大字一頡作纈竝與此合可知纈大利發當亦是突厥別部典兵之官名矣當武后時正突厥寇邊大亂之時而据突厥思摩傳言思摩旣入朝願留宿衛又默啜傳言遣子楊我支特勒入宿衛然

則阿伏師受亦必是突厥歸誠之官願留京師宿衛
故授以左鷹揚衛翊府中郎將仍係其原官於姓名
下以別其爲突厥人者也而默啜傳又有右衛左衛
左驍衛左武衛等官姓名下言將軍皆員外置又可
知此等宿衛之官無定員皆於員外添置猶今所謂
額外也故謂之員外置證之史傳載籍無不脗合真
罕有之奇物此符文字小而多乃用刀鐫刻極爲秀
勁流麗雖分四行亦參差不齊而首之雲麾二字列
於上同字之右又以其中揚員二字列於同字之上

其左外有第一二字稍大似標其數則與前武衛和川府及蜀州二符略同唐制魚符側無合同字此龜符正面又既有同字又標合同二半字於側蓋以二符之側文合而爲憑也則正面之同字乃虛設不及前內巡魚符之作合符爲當矣而惟一同字陽文餘皆陰文亦與和川府及蜀州二符同據此符刻有姓名蓋因員外置之官非一人亦是隨身所佩而非傳佩者而既標第一可知其亦非止於一此當是留於內之左符矣餘竝詳前

符與璽印同爲歷代典章法物設官兼掌其事皆不可輕忽而虎符等傳世尤尠予輯成官印攷證後復集是卷附於其後云

集古房征集錄

三

男 樹本鉤摹
樹寶接錄